

[真人真事改編]
我係一個最愛hurt人感情嘅仆街
校花

作者: 銷魂人

[序]

白皙透亮嘅皮膚、自帶電力嘅雙眼、豪爽嘅個性、活潑開朗...

呢副唔錯嘅外表、又唔錯嘅性格，再加上識唱歌、跳舞、玩drama.....

無錯，由細到大我都成日俾人讚好叻、好靚，從幼稚園、小學、到到中學，我都一直係眾望所歸嘅校花。

當然，係我呢16歲人生入面，緊係有過唔少嘅追求者啦。

但係，我係一個好理性、無咩感情嘅人。

其實正確啲黎講，我係一個表面好理性，內心好感性，但又唔識點表達出黎嘅人。

我好害怕感情，特別係愛情。

愛情對於每個少女黎講都好夢幻、好似好甜蜜咁，大家都對呢樣觸不到嘅嘢充滿期待，我都唔例外。

有無鍾意過人？當然有啦，咁我都係正常人黎嘅，雖然比較理性.....

係踏入咗中學呢四年間，我遇到過四個男仔，佢地帶住愛情向我衝埋黎。

對於一個屋企唔比拍拖、又未嘗試過愛情嘅女仔黎講，呢樣，係一件好恐怖嘅事.....

[第一章] 初踏青春校園

終於讀完小學，升上黎中學啦！

入黎呢間中學都生活咗幾個月，每個角落都差唔多比我睇勻曬...好吧，淨係幾個月，靠住呢塊幾靚嘅面，我又變成咗學校嘅風雲人物。

每次小息，總係會有十幾個來自唔同年級嘅師兄係班房門口度企住（呢間學校比較保守、比較乖，唔興送情書呢啲嘢，太出格），或者我係走廊行行下都總係會有幾個人無端端同我揮手講Halo.....

一如既往地，我會對佢地每個都投以一個善意嘅「微笑」，然後就走開。

其實恐怖啲嘅都試過，最令我心寒果次試過無端端有男仔衝埋黎摟住我。

對於呢啲，我會九秒九跑走，絕對絕對唔會比佢地任何笑容！

你問我淨係得F1，點解識咁多嘢，啲思想趕快變成咁，童真呢？

可能因為，我比較早熟掛。

雖然，我係校花，但係我都係一個乖乖女。我待人有禮(特別係老師)、平時專心上堂唔傾計、無俾人記過名留過堂...

所以，今次調位，老師就調咗我去一個以一字「曳」聞名全級嘅——王活勤隔離坐。

我心諭：PK！

[第二章] 調位

好吧，首先我要形容下呢一位王活勤同學嘅外表先。

佢身高153 (記住，依家係F1)，體重57 (偏肥)。

佢有一個4mm嘅魚蛋頭，蠟筆小新粗眉，眼仔又扁又長，充滿粉刺同黑頭嘅大鼻，同埋一個薄薄嘅嘴唇。

以我嘅角度黎睇 (我係外協)，佢真係好似一個大陸人。

佢呢，呢個人，真係一言難盡。

從小學都中學，佢都離唔開一個「曳」字。

上到呢間中學唔夠一個禮拜，佢已經成為左全校老師嘅頭號通緝犯。佢上堂訓覺、打機，小息係走廊跑、打人.....

啊，仲有佢好大聲，唔係一般嘅大聲，佢係非常非常非常非常大大大大聲！無論你係邊度，都總會聽到一把響亮得黎，又帶點沙啞嘅聲音係度講緊粗口.....

我呢，作為一個「乖乖女」，緊係唔會同呢D人有任何接觸同扯上任何關係啦。

好彩我地之前坐得無雷公咁遠，所以佢無論做咩事都唔會牽涉、影響到我。

而我，當然就好順利、好平靜咁過左半個平安嘅F1歲月。

依家，呢位聞名全校嘅王活勤同學，竟然會成為會同我朝夕相對嘅鄰座，我真係十萬個不情願.....

算，就當比啲歷練自己，只要唔理佢就得啦。

「Hi，我叫王活勤！」

「Hi。」我hea答佢。

「喂，你好似好多仔溝窩，你有無男朋友嚟？」

「哈，係咩，無窩。」「喇，我要同你畫楚河漢界，你唔準過界，因為我唔想同你有任何接觸。仲有，我唔鍾意講嘢，麻煩你唔好撩我傾計。就算你同我講嘢，我都未必會答你。」我即刻同佢畫清界線。

「哦，好啊，睇下點。」佢露出一個賤笑。

完!!!!!!我已經唔想再同佢講嘢啦！佢把聲真係好難聽啊啊啊啊!!!!!!

「各位同學再見。」「李老師再見。」

「啊！」我大叫，全班人望住我。

搞錯！佢竟然扯我條馬尾????天啊！佢竟然掂我？

「你做咩啊？」我好嬲咁問佢。

「無啊，想同你玩下咯。」講完，佢就衝左出班房。

天啊，我想調位啊！

[第三章] 我好似有啲啲掛住佢.....

調位後呢幾日對於我黎講簡直係生不如死，王活勤日日都係度扯我馬尾、拍我個頭、撩我講嘢.....

4月17號，係我地調位後嘅兩個月，佢終於請左假，有一日無返學。

果個朝頭早，我簡直開心到爆炸！我耳根終於清淨翻一日啦！

就係咁，係呢兩個月黎，我終於可以第一次安安靜靜、專專心心咁上堂啦。

上到第三堂，又到左我最唔鍾意嘅英文堂。我一轉去左手面，正當打算張開嘴開話題嘅時候，突然發現一係窩今日王活勤無返學窩。

好吧，隔離無人，即係呢兩堂咁討厭嘅英文堂我要自己一個捱過去啦.....

過左十分鐘，我又忍唔住轉去左面，再望翻去黑板。如是者，係呢兩堂難捱嘅英文堂入面，我竟然轉左去王活勤個位成五六次.....

我究竟係度做咩啊？

我慢慢諗翻，係，一開始，我的確係好唔鍾意佢。

但係，再過多一排，慢慢慢慢咁，我好似已經習慣左佢嘅存在。

佢日日扯我馬尾、打我個頭、撩我傾計，我好似已經習以為常，我平時仲會陪佢傾計、打返佢轉頭咁添。

我好似.....有啲啲掛住佢咁添.....